



**Nunatta Karsiata 2019-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.**

(Aningaasaqarnermut Naalakkersuisoq)

(Aappassaaneerneqarnera)

Kukkunersuineranut Ataatsimiititaliami ilaasortat qutsavigerusuppakka Nunatta Karsiata naatsorsuutaasa suliarineqarnerani suleqatigiilluarsimanitsinnut. Nuannaarpunga, Kukkunersuineranut Ataatsimiititaliap suliaanut soqutiginninneq annertusiartuinnarmat.

Kukkunersuineranut Ataatsimiititaliap isumaliuutissiissutaata saqqaani soorlu takusinnaagissi, Kukkunersuineranut Ataatsimiititaliap ilaasortai taarseraatigaatsiarsimapput. Tamanna soorunami uggornarpoq, Demokraatiniit isumaqaratta, kukkunersuinerami suliat ataavartumik misilittagaqarnissamillu ingerlatsinerat pingaartuusoq. Ukioq ataasiinnaq kingumut sulinnigilagut, akulikitsumillu kingumut ukiut arlallit qiviartarluta, ilisimasarlu taanna, taarseraannerit tamaasa, annaasarlugu.

Taamaattumik Kukkunersuineranut Ataatsimiititaliap sivisunermik atuuttarnissamik kissaataa taperserparput. Ullumimiit suliat pitsaassusaasa annertunerulernerannik qulakkeerisussaammat.

Ukioq manna naatsorsuutit allat assigalugit allaffissornikkut kingusinaarunneqarsimapput. Kukkunersuinerumullu Ataatsimiititaliap allattoqarfiani aamma taarseraattoqarsimalluni. Taamaattumillu ataatsimiititaliami ilaasortat marlussunnguit sivisuumik ilaasortaasimasut misilittagallit aallaavigalugit suliaqut ingerlassimavagut, taassumalu ersarissiseqqippaa kukkunersuinerami ataatsimiititaliami suliap ataavartuunissaata qanoq pingaartiginera.

Aningaasartuutit suli ammasut amerlanersaat, soorlu Nunatta Karsianit kukkunersuuisup uparuaraa, ukiorpassuarni ammasimapput. Isumaliuutissiissutitsinni pingaartillugu takutikkusussimavarput, Nunatta naatsorsuutaani aningaasartuutit ammasut kukkunersuuisumit uppernarsaatitut atsiorneqarsimasut qanoq siviutigisumi suli ammassanersut. Pingaartuuvoq, aningaasartuutit suli ammasut, siviullaamillu ammatinneqarsimasut, Naalakkersuisunit matuneqarnissaat.

Neriuppugut, ERP systemip atorineqalernissaa piviusunngungajalersoq qilanaaraarpullu Namminersorlutik Oqartussat naatsorsuuserineranut pitsanngorsaatini sunik kinguneqassanersoq, soorlu missigersuutiniq malittarinnittuarnissamut. Paasisinnaavarput, systemip nutaap atulernissaanut kontoplaanit nutaat allallu suliffeqarfinni nalornissutigineqartut kajumissaarutigerusuppappullu, suliap, sulisut systemimik nutaamik atuinissaminnut sungiussilluarnissaat nukittorsarneqassasoq.

Kukkunersuineranut ataatsimiititaliami ukkatari leraluttuinnagarput unaavoq kingunerisassanik uuttuineq. Nalinginnaasumik naatsorsuutini isiginiarneqartarput, Aningaasanut inatsimmi suna



akuersissutigineqarsimanersoq, sunalu atorneqarsimanersoq, taakkunanilu nikingasoqarpat nassuiaammik piunasaqartoqartarluni. Isumaqaarsinnaavugut akunnaatsorujussuusoq. Ukkatigineqarnerulerporli, Aningaasanut inatsimmi aningaasat immikkoortitatta aningasanik immikkoortitsigaangatta ilumut politikikkut siunniutatsinnut sunniuteqartarnersut.

Aningaasanut inatsimmi aningaasat immikkoortinneqartut sunniutaasa uuttortarnissaannut pitsaanagerusariaqarpugut. Sunniutit uttortassagaanni paasissutissanik peqartariaqarpoq. Taamaattumik pingaartuuvoq, siunissami uuttortaanissatsinnut kisitsisinik aaliangersimasunik nassuiaatinik peqarnissarput, suliniutip nutaap atuutilernerani kisitsisinik aallersinnaanissarput aningaasat immikkoortitatta politikikkut kissaatigisatta innuttaasunut ilumut iluaqutaanersut takusinnaalerlugu. Taanna aamma uparuarneqarpoq 3.4 *Ingerlatsinermi kukkunersiuineq Anquniakkat aamma anqusat aqunneqarnerat* ullumikkut sulineq inuit aallaavigalugit, periutsit pinnagit ingerlanneqarmat.

Sammissaq alla pisortat allaffeqarfiannut iluaqutaasinnaasoq tassaavoq pisortat pisiniartarnerisa aqunneqarnerat. Tassani periarfissaq annertooq atorneqanngitsoq, immikkoortortaqaarfinni annertunerujussuarmik pingaartinneqartussatut isumaqarfigisarput.

Kukkunersiuinermut ataatsimiititaliami tamanut tunngatillugu oqaaseqaatitsinni pingaartissimavagut atorfiit inuttaqanngitsut, avataaniit siunnersorteqarneq tassungalu atatillugu arlaleriarluta ukioq manna siusinnerusukkut piunasaarisarsimallugu aammalu Naalakkersuisunut piunasaarisarsimallutigu. Pisortat allaffeqarfiani sammisat ilai imartuut arlaqarput, taamaattumilluuna pisariaqartoq taakku sammisat ukkatarineqartuarnissaat, politikikkuiinnaanngitsoq, aammali ulluinnarni aqutsinermi.

Kukkunersiuinermut ataatsimiititaliap aalisagartassiissutit inuussutissarsiutigalugulu aalisarnermi akuersissutit aqunneqarnerat annertuumik misissorlugit aallartissimavai. Nalunaarusiap taassuma ataatsimiititaliami suliarinissaa qilanaaraarput, Deloitte-lu taassuminnga sukumiisumik suliaqarsimaneranut qutsavigalugu.

Naggataatigut nipisat suaasa Naalakkersuisunit suliarineqarnerani attuumassuteqarnermut atasumik suliaq eqqaannginngitsoorsinnaanngilarput. Suliaq soqutigineqaqisoq, ataatsimiititaliami annertuumik ukkatarisimasarput. Nunatta karsiata 2019-imi naatsorsuutaanut tunngassuteqanngilaq, isumaliuutissiissutitsinnili ilaavoq. Suliaq oqallisigineqarsimaqisoq politikikkuiinnaanngitsoq inuiaqatigiilli aamma akornanni. Suliaq suli inernilerneqanngilaq, sulialli naqqa tikillugu paasineqarnissaa soorunami tapersorsorparput, piarnerpaamillu inernilerneqarnissaa qilanaaralugu.

Naggataatigut innersuussutigerusupparput, Deloitte Nunatta karsianut kukkunersuisutut toqqarneqaqqissasut, innersuussutigarpullu, Nunatta Karsiata naatsorsuutai akuersissutigineqassasut.